

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ՔՈՒՇՅՈՒ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Ը. Տարի, Թիւ 359, Ուրբաթ, 11 ՆՈՅԵՄԲԵՐ, 2016

ՀԱՅԿԱԿԱՆ

Ըստ Կիրո Մանոյեանի. Հայաստան-Միացեալ Նահանգներ Յարաբերութիւններուն Մէջ Ոչ Մէկ Զարգացում Կ'ակնկալուի



Տանըլտ Թրամփի Միացեալ Նահանգներու նախագահ ընտրուելով Հայաստան-Միացեալ Նահանգներ յարաբերութիւններուն մէջ ոչ մէկ ակնյայտ զարգացում կ'ակնկալուի: Այս հաստատումը կատարած է ՀՅԴ Բիւրոյի անդամ, ՀՅԴ Հայ դատի եւ քաղաքական հարցերու գրասենեակի պատասխանատու Կիրո Մանոյեանը «Նիուզ»-ի հետ ունեցած զրոյցին ընթացքին:

Ըստ Մանոյեանի, Հայաստան-Միացեալ Նահանգներ յարաբերութիւններու զարգացումը որոշ չափով կախեալ է նաեւ Միացեալ Նահանգներ-Ռուսիա, Միացեալ Նահանգներ-Թուրքիա, նաեւ՝ Միացեալ Նահանգներ-Ազրպէյճան յարաբերութիւններու զարգացումէն. «Հայաստան-Միացեալ Նահանգներ յարաբերութիւնները պիտի մնան այնպէս, ինչպէս էին մինչեւ օրս, սակայն պէտք չէ մոռնալ նաեւ, որ երկու երկիրներուն յարաբերութիւնները կախեալ են Ռուսիա- Միացեալ Նահանգներ յարաբերութիւններու զարգացումէն: Եթէ Միացեալ Նահանգներ-Ռուսիա յարաբերութիւնները աւելի մեղմանան, Հայաստանը կրնայ որոշ չափով շահիլ, սակայն ասիկա միայն տուեալ հանգամանքով չէ պայմանաւորուած, այլեւ՝ հայկական-ամերիկեան յարաբերութիւնները կապուած են նաեւ Միացեալ Նահանգներ-Թուրքիա եւ Միացեալ Նահանգներ-Ազրպէյճան յարաբերութիւններու զարգացումէն», ըսած է Կիրո Մանոյեան:

Կիրո Մանոյեան նշած է, որ Միացեալ Նահանգներու Հայ դատի յանձնախումբը այս առիթով կազմակերպած քարոզարշաւին ընթացքին նախագահի երկու թեկնածուներէն ոչ ոքի աջակցած է, բայց եւ այնպէս պիտի շարունակէ իր համագործակցութիւնը նոր վարչակազմին հետ: «Միացեալ Նահանգներու Հայ դատի յանձնախումբին կողմէ ոչ ոքի նկատմամբ աջակցութիւն ցուցաբերելու երեւոյթը ցոյց կու տայ, որ մեծ ակնկալիքներ չունինք իրենցմէ: Սակայն, ասիկա դրական է այնքանով, որ կարելիութիւն պիտի ստեղծուի աշխատելու նաեւ այս վարչակազմին հետ: Կը կարծեմ, թէ ձեւ մը կ'որդեգրեն եւ որոշ չափով կ'աշխատին», դիտել տուած է ան:

Մանոյեան նաեւ նշած է, որ, ըստ իրեն, Տանըլտ Թրամփի յաղթանակը անակնկալ էր. «Փաստօրէն անոր յաղթանակը կը խօսի այն մասին, որ Ամերիկայի ընտրողներուն կէսէն աւելին դժգոհ էին գործող համակարգէն, ինչ որ Թրամփը ընտրելու հիմնական պատճառներէն մէկն էր: Հանրապետականէն դժգոհ էին, իսկ Հանրապետական կուսակցութիւնը Տանըլտ Թրամփին հետ այդքան լաւ յարաբերութիւններու մէջ չէր»:

«Մենք Գիտենք Ինչպես Գործել Երկրի Քաղաքական Համակարգին Մէջ» Կ'ըսէ Արամ Համբարեան



Միացեալ Նահանգներու հայկական համայնքին աչքերը բաց են. մենք գիտենք ինչպէս գործել երկրի քաղաքական համակարգին մէջ: Այս մասին «Նիուզ»-ի թղթակիցին հետ զրոյցի մը ընթացքին ըսած է Ամերիկայի Հայ դատի յանձնախումբի գործադիր տնօրէն Արամ Համբարեան:

Անդրադառնալով Միացեալ Նահանգներուն մէջ տեղի ունեցած նախագահական ընտրութիւններուն եւ հանրապետական թեկնածու Տանըլտ Թրամփի յաղթանակին՝ Արամ Համբարեան նշեց. «Մենք դաս քաղած ենք, որ նախընտրական քարոզարշաւին ժամանակ Միացեալ Նահանգներու նախագահի ոչ մէկ թեկնածու եւ ոչ մէկ կուսակցութիւն բանալի է մեր խնդիրներու լուծման համար: Միացեալ Նահանգներու մէջ մեր յաջողութեան իսկական շարժիչն ու բանալին մեր համայնքի կազմակերպումն ու ներուժն է, որ գործադրուած է քաղաքական հոլովոյթներու ընթացքին: Մենք պատրաստ ենք աշխատելու Տանըլտ Թրամփի ու Սպիտակ տան հետ՝ մեր խնդիրներուն լուծման համար: Բայց մենք նաեւ կը գիտակցինք, որ ամենէն արժէքաւորը մեր ուժն ու կամքն են: Մենք պէտք է աշխատինք քաղաքական առաջնորդներու հետ եւ միայն մենք մեր վրայ յոյս դնենք»:

Պատասխանելով այն հարցումին, թէ Թրամփի ընտրուիլը ինչպէ՛ս պիտի անդրադառնայ Միացեալ Նահանգներու արտաքին քաղաքականութեան վրայ, մասնաւորապէս Հարաւային Կովկասի ուղղութեամբ, Ամերիկայի Հայ դատի յանձնախումբի գործադիր տնօրէնը շեշտեց. «Նախ Միացեալ Նահանգներու մէջ քարոզարշաւի ժամանակ չէ խօսուած երկրի արտաքին քաղաքականութեան մասին ու խօսք չէ եղած Հարաւային Կովկասի մասին, երկրորդ, ինչպէս յայտնի է, քարոզարշաւը որոշակի տրամաբանութիւն ունի: Անիկա կը տարբերի իրական կառավարումէն: Հիմա մենք պէտք է տեսնենք փաստերը, բառերը կարելոր չեն: Մեր աչքերը բաց են: Մենք բազմիցս տեսած ենք նոյնատիպ խնդիրներ տարբեր նախագահներու կառավարման ժամանակ՝ մենք տեսած ենք Ռիկընը, Պուշը, Քլինթընը, Պուշ կրտսերը, Օպաման: Մենք գիտենք, թէ որոնք են այդ մարդիկ, ու մենք ինչպէ՛ս պէտք է գործենք այդ համակարգին մէջ»:

Նախագահ Սերժ Սարգսեան Կ'այցելէ Արաբական Միացեալ Էմիրութիւններ

9 Նոյեմբերին Հայաստանի նախագահ Սերժ Սարգսեան պաշտօնական այցելութիւն տուած է Արաբական Միացեալ Էմիրութիւններ: Դիմաւորումի պաշտօնական արարողութիւններէն ետք նախագահ Սարգսեան եւ Ապու Տապիի գահաժառանգ իշխան շէյխ Մոհամետ պըն Ջայէտ Ալ Նահիանի միջեւ տեղի ունեցած է ընդլայնուած կազմով հանդիպում՝ երկու երկիրներու պաշտօնական պատուիրակութիւններու անդամներուն մասնակցութեամբ. անոր յաջորդած է Սերժ Սարգսեանի եւ շէյխ Մոհամետ պըն Ջայէտ Ալ Նահիանի դռնփակ առանձնազրոյցը:

Նշելով, որ Հայաստան հետամուտ է Արաբական Միացեալ Էմիրութիւններուն հետ քաղաքական երկխօսութեան աշխուժացման եւ համախմբուած ու փոխադարձ գործակցութեան զարգացման, հանրապետութեան նախագահը նաեւ յոյս յայտնած է, որ այս պաշտօնական այցելութեան ծիրին

մէջ տեղի ունենալիք բանակցութիւններն ու կնքուելիք պայմանաւորուածութիւնները իրենց զգալի դերը պիտի ունենան երկկողմանի յարաբերութիւններու հետագայ զարգացման մէջ:

Նախագահ Սարգսեան գոհունակութեամբ նշած է, որ Հայաստանի եւ Արաբական Էմիրութիւններուն միջեւ վերջին տասնամեակին յարաբերութիւնները զարգացման նոր եւ աւելի գործնական փուլ թելակոխած են, երկու երկիրներուն միջեւ ստորագրուած են տարբեր մարզերու մէջ համագործակցութեան վերաբերող երկու տասնեակէ աւելի փաստաթուղթեր, որոնց վրայ պիտի աւելնան նորերը՝ այդ այցելութեան ընթացքին ձեռք բերուած:

Ջրուցակիցները համակարծիք եղած են այն մասին, որ դարերու պատմութիւն ունեցող հայ եւ արաբ ժողովուրդներու բարեկամութեան վրայ հիմնուած Հայաստանի եւ արաբական երկիրներու, որոնց կարգին Արաբական Միացեալ Էմիրութիւններու միջպետական յարաբերութիւնները յաջողութեամբ կը զարգանան: Երկկողմանի փոխադարձ գործակցութեան զարգացման ծիրին մէջ պաշտօնական անձնաւորութիւնները կարելոր նկատած են երկու երկիրներուն միջեւ պարբերաբար կայացող քաղաքական խորհրդակցութիւնները, ինչպէս նաեւ տարբեր մակարդակի փոխադարձ այցելութիւնները:

Հայաստանի նախագահը եւ շէյխ Մոհամետ պըն Չայէտ Ալ Նահիան երկու երկիրներուն միջեւ առեւտրական-տնտեսական փոխադարձ գործակցութեան ներկայի կշռոյթը խթանելու իմաստով կարելոր նկատած են միջկառավարական յանձնախումբին աշխատանքը, որ, անոնց համոզումով, նպաստաւոր հարթակ պիտի ըլլայ փոխադարձ շուկաներու ուսումնասիրութեան, տարբեր մարզերու մէջ շահաւէտ ներդրումներու իրականացման, ինչպէս նաեւ երկու երկիրներու տնտեսութեան մէջ տեղի ունեցող բարեփոխումներու եւ նորարարութիւններու ընթացքին հետեւելու: Կողմերը պայմանաւորուած են Հայաստանի տնտեսութեան մէջ Էմիրաթական ներդրումներու ներգրաւումը աւելի աշխուժացնել եւ գործնական դարձնել՝ արդիւնաւէտ ծրագիրներու մշակման եւ գործադրութեան ճամբով:

Հանդիպումին ընթացքին բացի երկկողմանի փոխադարձ հետաքրքրութիւն ներկայացնող խնդիրներէն, նաեւ անդրադարձ կատարուած է միջազգային հարցերուն, միջինարեւելեան ճգնաժամին, շրջանին մէջ ծաւալող իրադարձութիւններուն, Հարաւային Կովկասի մէջ առկայ խնդիրներուն ու մարտահրաւերներուն եւ Լեռնային Ղարաբաղի տագնապի լուծման հոլովոյթին:

Նոյն օրը նախագահը հանդիպում ունեցած է նաեւ Արաբական Միացեալ Էմիրութիւններու փոխվարչապետ, նախագահական հարցերով նախարար շէյխ Մանսուր պըն Չայէտ ալ Նահիանի հետ:

Նախագահ Սարգսեան այցելած է Ապու Տապիի Սրբոց Նահատակաց հայկական եկեղեցի, եկեղեցւոյ կից գործող «Արա Խանոյեան» կիրակնօրեայ վարժարան, շէյխ Չայէտ Մեծ մզկիթ եւ Հայաստանի դեսպանատուն: Սրբոց Նահատակաց եկեղեցի այցելութեան ծիրին մէջ նախագահը ծաղիկներ զետեղած է Հայոց ցեղասպանութեան նահատակներուն նուիրուած խաչքարին առջեւ: Եկեղեցւոյ մէջ տեղի ունեցած գոհաբանական աղօթքէն ետք արտասանած իր խօսքին մէջ նախագահ Սերժ Սարգսեան անդրադարձած է եկեղեցւոյ արժէքին՝ հայ ժողովուրդի ինքնութեան պահպանման ու յարատեւութեան մէջ:

Հանրապետութեան նախագահը նաեւ շնորհակալութիւն յայտնած է Արաբական Միացեալ Էմիրութիւններու իշխող ընտանիքին՝ ի դէմս Ապու Տապիի գահաժառանգ իշխան շէյխ Մոհամետ պըն Չայէտ Ալ Նահիանի, որ կարելիութիւն տուած է հայկական Սրբոց Նահատակաց

եկեղեցին շինելու: Ան ընդգծած է, որ արաբական աշխարհի սրտին վրայ կանգնեցուած այս եկեղեցին միջկրօնական հանդուրժողականութեան եւ փոխադարձ յարգանքի ու համակրանքի խօսուն վկան է, որ բարեբեր հող կը ստեղծէ նաեւ տարբեր կրօններու ներկայացուցիչներու խաղաղ համակեցութեան համար: Ազգային առաջնորդարանին մէջ նախագահ Ս. Սարգսեան կարճատեւ հանդիպում ունեցած է գաղութի եւ եկեղեցական գործիչներու հետ:

Միացեալ Էմիրութիւններու հիմնադիր նախագահ շէյխ Չայէտի անուան Մեծ մզկիթ այցելութեան ընթացքին նախագահ Մերժ Սարգսեան մզկիթին մէջ գտնուող դամբարանին առջեւ յարգանքի տուրք մատուցած է շէյխ Չայէտ պըն Սուլթան ալ Նահիանի յիշատակին եւ գրառում կատարած պատուոյ մատեանին մէջ:

Այցելութեան աւարտին տեղի ունեցած է նուէրներու փոխանակման արարողութիւն:

Հրապարակուած է Լեռնային Ղարաբաղի Հանրապետութեան Սահմանադրութեան Նախագիծը

Արցախի Հանրապետութեան Ազգային ժողովի նախագահ Աշոտ Ղուլեանի ղեկավարութեամբ 8 Նոյեմբերին տեղի ունեցած է Լեռնային Ղարաբաղի Հանրապետութեան նախագահին առընթեր սահմանադրական բարեփոխումներու մասնագիտական յանձնախումբի հերթական նիստը, կը յայտնեն Լեռնային Ղարաբաղի Հանրապետութեան Ազգային ժողովի լրատուական ծառայութենէն:



Ամփոփելով վերջին շաբթուան ընթացքին կատարուած աշխատանքները՝ Աշոտ Ղուլեան նշած է, որ սահմանադրութեան նախագիծը պատրաստ է հանրութեան ներկայացնելու համար: Մասնագիտական յանձնախումբի նախագահը ընդգծած է, որ փաստաթուղթը մշակուած է հանրապետութեան նախագահի համաձայնութեան արժանացած հայեցակարգի շրջագիծին մէջ:

«Սահմանադրութեան հրապարակուող նախագիծը աշխատանքային տարբերակ է: 10 Նոյեմբերին կը սկսի հանրային քննարկումներու շարքը՝ ներկայացուած նախագիծին շուրջ հասարակութեան կարծիքներն ու առաջարկները ստանալու համար, որմէ ետք միայն սահմանադրութեան նախագիծը պիտի ներկայացուի հանրապետութեան նախագահին», նշած է Աշոտ Ղուլեանը:

Սահմանուած կարգին համաձայն, Լեռնային Ղարաբաղի Հանրապետութեան նախագահին համաձայնութիւնը ստանալէ ետք սահմանադրութեան նախագիծը կը ներկայացուի Ազգային ժողովին, որուն կը յաջորդէ քննարկումներու մէկ փուլ եւս:

Սահմանադրութեան նախագիծի ելեկտրոնային տարբերակը տեղադրուած է Լեռնային Ղարաբաղի Հանրապետութեան Ազգային ժողովի կայքին մէջ:

www.armenianprelacykw.org

Իւրաքանչիւր Աշխատող Ամսական 1000 Դրամ Պիտի Վճարէ Բանակին



10 Նոյեմբերի կառավարութեան նիստին պաշտպանութեան նախարար Վիգէն Սարգսեան ներկայացուցած է որոշման նախագիծ՝ զինուորներու կեանքին եւ առողջութեան հասած վնասներու փոխհատուցման, անոնց ընտանիքներու անդամներուն ընկերային ապահովութեան մասին օրէնքին մէջ փոփոխութիւններ կատարելու, պետական կենսաթոշակներուն վերաբերող օրէնքին մէջ փոփոխութիւններ կատարելու մասին, որով կ'առաջարկուի հատուցում վճարել ընտանիքներուն այն զինուորներուն, որոնք մահացած կամ հաշմանդամ եղած են մարտական գործողութիւններու, շփման գիծին մէջ մարտական հերթապահութեան կամ յատուկ պարտականութիւն կատարելու ատեն:

«Ապրիլ 2016-ի դէպքերը ցոյց տուին, որ ծաւալուն մարտական գործողութիւններու արդիւնքով զինուորներու կեանքին եւ առողջութեան պատճառող վնասները միայն Հայաստանի պիտճէի նախատեսուած միջոցներով եւ ամբողջ ծաւալով հոգալ կարելի չէ, եւ այդ պատճառով անհրաժեշտ են լրացուցիչ ֆինանսական աղբիւրներ եւ նոր համակարգ: Այդ նպատակով, նախագահին յանձնարարութեամբ, կը մշակուի ծրագիր, որ կը նախատէ ներդնել հատուցման յատուկ համակարգ, որ կը ներառէ պետական եւ հասարակական աջակցութեան տարրեր: Համակարգի յենասիւնը՝ իրաւաբանական անձի կարգավիճակ ունեցող հիմնադրամը, կը միաւորէ ստացուող դրամական միջոցները՝ ապահովելով այդ միջոցներու մասնագիտական կառավարումը, իսկ յառաջացած միջոցներու հաշուոյն կը փոխհատուցուին զինուորներուն կեանքին կամ առողջութեան պատճառուած վնասները: Զինուորներու մահուան պարագային հատուցման գումարները կը վճարուին անոնց ընտանիքներու անդամներուն: Համակարգը նախատեսուած է ներդնել 28 յունուար 2017-էն ետք յառաջացող դէպքերու համար», ըսած է նախարարը:

Անոր համաձայն, մահուան եւ առաջին կարգի հաշմանդամութեան պարագային մէկ անգամով կը վճարուի 10 միլիոն դրամ, երկրորդ կարգի հաշմանդամութեան պարագային՝ 5 միլիոն դրամ:

Ան նաեւ խօսած է այս նպատակով գումար գոյացնելու ձեւերուն մասին՝ հաստատելով, որ իւրաքանչիւր անձ իր մասնակցութիւնը պիտի բերէ այս աշխատանքին: «Հիմնադրամի հատուցումները վճարելու համար անհրաժեշտ դրամական միջոցները կը ձեւաւորուին հետեւեալ աղբիւրներէն՝ իւրաքանչիւր աշխատող ֆիզիքական անձ կը վճարէ ամսական 1000 դրամ՝ իր աշխատավարձէն, արժեթուղթերու վաճառքէն, դրամաշնորհներէ, նուիրատուութիւններէ: Հիմնադրամը կ'ունենայ կառավարման համակարգ՝ կառավարութեան, Կեդրոնական դրամատան եւ հասարակական կազմակերպութիւններու ներկայացուցիչներէ կազմուած հոգաբարձուներու խորհուրդ, կ'ունենայ գործադիր տնօրէն, գործադիր յանձնախումբ, որուն միակ գործառոյթը հիմնադրամի միջոցներու մասնագիտական կառավարումը պէտք է ըլլայ», յայտնած է Վիգէն Սարգսեան:

Ան նշած է, որ ծրարը կարելիութեան պարագային պէտք է նկատել անյետաձգելի եւ յառաջիկայ տարի իսկ սկսի գործադրուիլ:

ՄԻՋԱԶԳԱՅԻՆ

Տանըլտ Թրամփ՝ Միացեալ Նահանգներու Նախագահ



Հանրապետական կուսակցութեան թեկնածու, միլիառատեր Տանըլտ Թրամփ 8 Նոյեմբերին Միացեալ Նահանգներու մէջ նախագահական ընտրութեան ընթացքին պարտութեան մատնելէ ետք իր դեմոկրատական մրցակից, Միացեալ Նահանգներու արտաքին գործոց նախկին նախարար Հիլըրի Բլինթընը, դարձաւ Միացեալ Նահանգներու 45-րդ նախագահը:

Հանրապետական թեկնածուն սուր մրցակցութեան թատերաբեմ եղող նահանգներու՝

Ֆլորիտայի, Օհայոյի եւ Նորթ Բարոլայնայի մէջ յաղթանակ արձանագրելով պարտութեան մատնեց Բլինթընը՝ հակառակ հարցախոյզներու նախատեսութիւններուն:

Համաշխարհային սակարանները, քարիւղի գինը եւ տոլարի արժեքը անկում կրեցին, իսկ ոսկիին գինը բարձրացաւ, երբ քուէահամարի ընթացքին Թրամփի ընտրութիւնը սկսաւ շօշափելի դառնալ: Բացառութիւն էր Մոսկուայի սակարանը, որ աճ արձանագրեց:

Նշենք, որ գործադիր իշխանութեան պետը եղող նախագահի ընտրութեան կողքին տեղի ունեցան խորհրդարանական ընտրութիւններ: Հանրապետական կուսակցութիւնը գործադիր իշխանութեան կողքին իր վերահսկողութեան տակ առաւ նաեւ ամբողջ Քոնկրէսը՝ Ներկայացուցիչներու տան եւ Ծերակոյտին մէջ մեծամասնութիւն ապահովելով:

Նշենք նաեւ, որ մեծաթիւ ամերիկացիներու Քանասայի քաղաքացիութեան դիմումներուն պատճառով Քանասայի ներգաղթի յատուկ կայքի աշխատանքը խանգարուեցաւ:

Ընտրուած նախագահը Նիւ Եորքի մէջ իր յաղթանակի հաւաքին ընթացքին խօսք առնելով ըսաւ. «Հեռաձայնային հաղորդակցութիւն ստացայ արտաքին գործոց նախարար Բլինթընէն: Ան շնորհաւորեց մեզ մեր արձանագրած յաղթանակին համար:

«Հիլըրի ժրջանօրէն աշխատած է երկար ժամանակաշրջանի մը վրայ, եւ մեր երկրին նկատմամբ անոր ծառայութեան համար մենք անոր կը պարտինք մեծ երախտագիտութիւն», շեշտեց ան:

«Ժամանակն է, որ քով-քովի գանք՝ իբրեւ մէկ միացեալ ժողովուրդ», աւելցուց ան՝ ընդգծելով, որ ինք պիտի ըլլայ բոլոր ամերիկացիներուն նախագահը:

Բլինթըն Չորեքշաբթի օր երեկոյեան խօսք առնելով յայտնեց. «Նախագահական ընտրութիւնը ցոյց տուաւ, որ հայրենիքը մեր նախատեսածէն շատ աւելի պառակտուած է»: «Ամերիկեան երազը մեծ է եւ կը բաւէ բոլորին, ինչ ալ ըլլայ անոնց ծագումը», նշեց ան:

Բլինթըն նաեւ յայտարարեց, որ Թրամփին առաջարկած է իրեն հետ գործակցիլ Ամերիկայի համար, եւ յոյս յայտնեց, որ Թրամփ յաջող նախագահ մը ըլլայ:

Ռուսիոյ նախագահ Վլատիմիր Փութին շնորհաւորեց Թրամփը եւ կոչ ուղղեց՝ միասնաբար աշխատելու Մոսկուա-Ուաշինկթըն յարաբերութիւնները ամրապնդելու:

Ռուսիոյ նախագահի բանբեր Տմիթրի Փեսքով յայտնեց, որ Թրամփի առաջին յայտարարութիւնները ռուս-ամերիկեան յարաբերութիւններու տեղաշարժի յոյս կը ներշնչեն՝ նշելով, որ Միացեալ Նահանգներու ընտրութեան արդիւնքները չեն նշանակեր, թէ Մոսկուայի եւ Ուաշինկթընի յարաբերութիւններուն մէջ վիճելի հարցերը մէկ ակնթարթի մէջ պիտի լուծուին: «Յիմարութիւն պիտի ըլլար այդպէս կարծել: Սակայն հիմնականը քաղաքական կամք ունենալն է եւ վիճելի հարցերը բանակցութիւններու միջոցով եւ ոչ թէ ճակատումի կամ որեւէ անհետեւ անհետեւ անհետեւ միջոցով լուծելու մտադրութիւն», ընդգծեց Փեսքով:

Թուրքիոյ վարչապետ Պինարի Երլտըրըմ իր կարգին շնորհաւորեց Թրամփը եւ անոր ընտրութիւնը նկատեց երկկողմանի յարաբերութիւններու ամրապնդման առիթ մը:

Իրանի արտաքին գործոց նախարար Մոհամետ Ճաւատ Զարիֆ Թրամփին կոչ ուղղեց յարգելու միջազգային համաձայնութիւնները:

Ֆրանսայի արտաքին գործոց նախարար ժան Մարք Էյրօ նշեց, որ Թրամփի յաղթանակը բազմաթիւ հարցականներ կը ստեղծէ:

Ֆրանսայի նախագահ Ֆրանսուա Հոլլանտ իր կարգին յայտնեց, որ Թրամփի յաղթանակը անորոշութեան ժամանակաշրջան մը կը բանայ: Ըստ անոր, այդ ընտրութիւններէ ետք Ֆրանսան պետք է աւելի հզօրանայ եւ Եւրոպան աւելի միասնական դառնայ:

Նշենք, որ նախագահական ընտրութեան արդիւնքներուն յայտարարութենէն ետք, Քալիֆորնիոյ մէջ տեղի ունեցան բողոքի ցայցեր եւ անկարգութիւններ, որոնց մասնակիցները կը բացազանչէին՝ «Ան մեր նախագահը չէ»:

Գերմանիա Թուրքիոյ Կացութիւնը Տագնապեցնող Եւ Գերմանիոյ Դեմ Անոր Յայտարարութիւնները Անհասկնալի Կը Նկատէ

«Տեօչէ Վելլէ» կը հաղորդէ, որ Գերմանիոյ վարչապետ Անկելա Մերքել Թուրքիոյ մէջ ընդդիմադիր «Ճումհուրիյէթ» օրաթերթի լրագրողներու եւ ղեկավարներու, ինչպէս նաեւ քրտամէտ ժողովուրդներու ժողովրդավարական կուսակցութեան երեսփոխաններու ձերբակալումէն ետք Անգարային կոչ ուղղած է պաշտպանելու հիմնարար ազատութիւնները:



Նորվեկիոյ վարչապետին հետ միացեալ ասուլիսի մը ընթացքին Մերքել յայտարարած է, որ վերջին օրերուն Թուրքիայէն հիմնարար ազատութիւններու հետ կապուած ահազանգեր կը ստանայ:

Անդրադառնալով Գերմանիոյ Եւրոպայի հարցերու նախարար Միշել Ռոթի յայտարարութեան, որուն մէջ վերջինս պատրաստակամութիւն յայտնած էր ապաստան տրամադրելու Թուրքիայէն դիմողներուն, Մերքել ըսած է. «Նախ եւ առաջ ջանքեր կը գործադրենք Թուրքիոյ մէջ ստեղծելու այնպիսի միջավայր մը, որ մարդիկ ստիպուած չըլլան ապաստան ստանալու դիմում ներկայացնել եւ երկրին մէջ պահպանուիս հիմնական ազատութիւնները»:

Միշել Ռոթ Թուրքիոյ մէջ արձանագրուող զարգացումներուն վերաբերեալ ըսած էր. «Թուրքիոյ մէջ ներկայիս տեղի ունեցող իրադարձութիւնները որեւէ առնչութիւն չունին եւրոպական արժէքներուն, օրինական պետութեան սկզբունքին, ժողովրդավարութեան եւ մամլոյ ազատութեան հետ: Այս պատճառով թրքական կառավարութեան մեր պատասխանը պարզ է եւ յստակ՝ այսպէս կարելի չէ շարունակել»:

Յիշեցնելով, որ վերջին շրջանին Թուրքիոյ մէջ մեծ թիւով երեսփոխաններ, գիտնականներ եւ լրագրողներ ձերբակալուած են, Ռոթ նշած էր, որ Գերմանիոյ կառավարութիւնը համագործակցութեան մէջ է բոլոր ճնշուածներուն հետ: «Գերմանիան աշխարհի համար բաց երկիր է, անիկա բաց է քաղաքական հետապնդումներու ենթարկուող ոեւէ անձի համար: Բոլորը կրնան ապաստան ստանալու խնդրանքով դիմել Գերմանիոյ», նշած է ան:

Գերմանիոյ արտաքին գործոց նախարար Ֆրանք Վալթեր Շթայնմայեր իր կարգին հերքած է իր թուրք գործընկերոջ՝ Մելուրթ Չաոււշօղլուի այն յայտարարութիւնները, թէ Գերմանիան կ'աջակցի ահաբեկչութեան եւ ՔԱԿ-ին:

«Կը կարծեմ, որ Անգարան շատ լաւ գիտէ, թէ իրականութիւնը հակառակն է», ըսած է Շթայնմայեր՝ նշելով, որ ՔԱԿ-ը եւ Թուրքիոյ մէջ գործող այլ ծայրայեղական խմբաւորումները Գերմանիոյ մէջ արգիլուած են: «Հետեւաբար չեմ կրնար հասկնալ Գերմանիոյ դէմ Թուրքիոյ կատարած յայտարարութիւնները», ըսած է ան:

Շթայնմայեր կարծիք յայտնած է, որ Թուրքիոյ մէջ զինուորական յեղաշրջումին յաջորդած զարգացումները պետք է կատարուին օրինական պետութեան սկզբունքներուն համահունչ: Ան անընդունելի նկատած է Թուրքիոյ մէջ զանգուածային ձերբակալութիւնները եւ քննադատած քրտամէտ կուսակցութեան երեսփոխաններուն կալանաւորումը:

Չաոււշօղլու 8 Նոյեմբերին յայտարարած էր, որ Գերմանիան միշտ եղած է ոչ թէ Թուրքիոյ օգտին, այլ Թուրքիոյ դէմ նախաձեռնութիւններու կողքին: Ան յայտարարած է, որ մինչեւ օրս թրքական կողմը Գերմանիայէն պահանջած է իրեն յանձնել ՔԱԿ-ի չորս հազարէ աւելի անդամ, սակայն անոնցմէ ոչ մէկը գերմանական կողմը յանձնած է Անգարային:

Թուրքիոյ արտաքին գործոց նախարարին խօսքով՝ քիւրտ զինեալները Գերմանիոյ տարբեր շրջաններուն մէջ գումար կը հաւաքեն, եւ Գերմանիոյ ղեկավարութիւնը քաջատեղեակ է այդ փաստէն: «Պատահական չէ, որ բոլոր ահաբեկիչները կը նախընտրեն Գերմանիան: Այժմ ալ Գերմանիան գրկաբաց կ'ընդունի կիւլենականները: Թուրքիոյ մէջ ահաբեկչական գործողութիւնները իրականացնող ահաբեկիչներուն մեծագոյն աջակցութիւն ցուցաբերած երկիրը Գերմանիան է», յայտարարած է Չաոււշօղլու:

ԱՆԴՐԱԴԱՐՁ

Պատակտուած Ընկերութեան Ամրագրումն Ու Ժողովրդավարութեան Յաղթանակը

Հակառակ լրատուամիջոցներու ջախջախիչ մեծամասնութեան եւ հոլիվուտեան աստղերու Հիլըրի Քլինթընի նկատմամբ ցուցաբերած աջակցութեան, մեծաթիւ ականաւոր հանրապետականներու աջակցութեան բացակայութեան եւ իրերայաջորդ հարցախոյզներու բացասական նախատեսութիւններուն, Միացեալ Նահանգներու նախագահական ընտրութեան յաղթանակ արձանագրեց Հանրապետական կուսակցութեան թեկնածուն՝ Տանըլտ Թրամփը, իրողութիւն մը, որ կարելի է նկատել ժողովրդավարութեան յաղթանակը: Սակայն հարցականի տակ առնուեցաւ մինչեւ 1956 Միացեալ Նահանգներու նշանաբանը եղած «Է Փլուրիպուս Ունում»-ը՝ «բազմաթիւ (ժողովուրդներէն) մէկ»-ը, որովհետեւ ամերիկացի ժողովուրդը այս ընտրութիւններէն դուրս կու գայ իր ստ պատակտուած:



Արդարեւ, ըստ «Սի.Էն.Էն.»-ի կատարած հարցախոյզին, այր մարդոց 53 առ հարիւրը քուէարկած է ի նպաստ Թրամփի, իսկ կիներուն 54 առ հարիւրը՝ Քլինթընի: 18-29 տարեկան քաղաքացիներուն 55 առ հարիւրը եւ 30-44 տարեկան քաղաքացիներուն 50 առ հարիւրը քուէարկած է Քլինթընի, իսկ 45 տարեկանէն վեր եղող քաղաքացիներուն 53 առ հարիւրը՝ Թրամփի: Այլ հարցախոյզներ ցոյց տուին, որ ամերիկեան ծագումով 10 ամերիկացիներէն 9-ը եւ լատին ամերիկացիներու երկու երրորդը քուէարկած է ի նպաստ դեմոկրատականներուն, իսկ սպիտակամորթներուն կեսէն աւելին՝ Թրամփի:

Ճիշդ է, որ, ինչպէս երկրի տարածքին ոստիկաններու կողմէ սեւամորթներու սպանութեան դէմ արձանագրուած բողոքի բուռն ցոյցերը կը վկայեն, պատակտումի մթնոլորտը արդէն գոյութիւն ունէր նախագահական ընտրապայքարի սկիզբէն առաջ, սակայն Թրամփի սուր եւ կարծր կեցուածքները անհամեմատ կերպով հրահրեցին, թերեւս ալ երեւան հանեցին այդ պատակտումին տարողութիւնը: Բարացուցական է մեծաթիւ ամերիկացիներու Քանատայի քաղաքացիութեան դիմելու արշաւը, որուն տարողութիւնը պատճառ դարձաւ Քանատայի ներգաղթի կայքի աշխատանքի խանգարման: Ծանօթ է, որ ամերիկացիներուն համար քանատացիները յաճախ հեզնանքի առարկայ են, եւ ահա Միացեալ Նահանգներու մեծաթիւ քաղաքացիներ կը նախընտրեն քանատացի ըլլալ, քան թէ ապրիլ «թրամփեան արժէքներ»-ով ղեկավարուող երկրի մը մէջ:

Աւելի՛ն, ընտրութեան արդիւնքներու յայտարարութենէն ետք, Քալիֆորնիոյ Օքլընտ շրջանին մէջ արձանագրուեցան անկարգութիւններ եւ բողոքի ցոյցեր, որոնց մասնակիցները կը բացագանչէին. «Ան մեր նախագահը չէ»: Նշեալ երկու դէպքերը կու գան վկայելու, թէ հակառակ վերքերը դարմանելու եւ բոլորին նախագահը ըլլալու մասին յաղթական Թրամփի յայտարարութիւններուն, նախագահական ընտրութիւնը եկաւ ամրագրելու ամերիկեան ընկերութեան պատակտումը: Սան Ֆրանսիսքոյի օրաթերթերէն «Իսթ Պէյ Թայմզ» ընտրութենէն առաջ դիպուկ կերպով նշեց, որ ընտրութիւնը «Ամերիկայի ոգիին համար ճակատում մըն է»:

Հանրապետականները գործադիր իշխանութեան կողքին յաջողեցան իրենց վերահսկողութեան տակ առնել նաեւ օրէնսդիր մարմինը՝ Քոնկրեսը իր երկու պալատներով: Իրողութիւն մը, որ մէկ կողմէ ազատականութեան պարտութեան եւ պահպանողականութեան յաղթանակին մասին կը վկայէ, սակայն միեւնոյն ժամանակ կարելի չէ զայն անջատել Եւրոպայի տարածքին աջակողմեան ուժերու վերելքի ընդհանուր երեւոյթէն: Հանրապետականներու յաղթանակը հերթական վկայութիւնն է Արեւմուտքին՝ իր անդրատլանտեան երկու թեւերով դէպի աջ թեքումին:

ՎԱՀՐԱՍ ԷՄՄԻԵԱՆ



«ԵՌԱՆԱՎ» ՍՊԸ
“YERANAV” LLC




ՎԻՃԱԿԱՀԱՆՈՒԹԻՒՆ

Կազմակերպությամբ՝
Քուէյթի Ազգային Վարչության
ՊԱՐԳԵԻԸ՝

ԲՆԱԿԱՐԱՆ ՄԸ ԵՐԵՒԱՆԻ ՄԷՋ

Հայաստանի «Եռանալ» ՍՊՀ շինարարական ընկերության կողմից
Նուիրուած Եկեղեցույս Հիմնադրամին

Դաւիթաշէն 4րդ թաղաման 45/5- Երեւան
Ընդհանուր Մակերես՝ **54.10 m²**



Վիճակահանություն ստանալու համար դիմել :

- Առաջնորդարան (25614392)
- Տիկ. Նազիկ Միւմալիւեան (99338334)
- Պրն. Արամ Յակոբեան (97709976)
- Պրն. Պերճ Կենճոյեան (99676975)

ՊԱՏՄԱԲԱՆԻՆ ԷԶԵՐԷՆ

Ս. Թադէոս Առաքեալ

Հայաստանի մէջ քրիստոնէութիւնը քարոզող առաջին առաքեալները եղան Ս. Թադէոս եւ Ս. Բարթողիմէոս: Ս. Թադէոս Առաքեալ Քրիստոսի աշակերտներէն մէկն էր: Քրիստոնէութիւնը քարոզելու համար գնաց Եդեսիա քաղաքը:



Եդեսիոյ Աբգար թագաւորը հիւանդ էր: Ան Յիսուսին լուր դրկած էր, որ գայ եւ զինք բժշկէ, սակայն Յիսուս զբաղած ըլլալով խոստացած էր, որ իր աշակերտներէն մէկը կ'ուղարկէ իր մօտ: Թադէոս Առաքեալին Եդեսիա մուտքով Յիսուսի խօսքը կը կատարուէր: Թադէոս թագաւորին արքունիքը մտնելով Յիսուսին կեանքը, գործերն ու պատուիրանները կը քարոզէ:

Աբգար թագաւոր անոր խօսքերէն ազդուելով կը հաւատայ Յիսուսին եւ հրաշքով կը փրկուի իր հիւանդութենէն: Ս. Թադէոս քրիստոնէութիւնը քարոզեց նաեւ ժողովուրդին, որմէ ազդուելով բազմաթիւ մարդիկ եւ իշխաններ հաւատացին Յիսուսին եւ մկրտուեցան:



Թադէոս Առաքեալ հաւատացեալներուն համար եկեղեցիներ կառուցեց: Ս. Թադէոս Առաքեալ Եդեսիայէն անցաւ Հայաստան, ուր կռապաշտութիւնը համատարած էր: Թադէոս Առաքեալ զանազան քաղաքներ շրջեցաւ եւ քրիստոնէութիւնը քարոզելով, հաւատացեալները մկրտեց Յիսուսի անունով: Թադէոս Առաքեալ համարձակութիւնը ունեցաւ արքունիք մտնելու եւ հոն քրիստոնէութիւնը քարոզելու: Այդ ժամանակ հայոց թագաւորը

Սանատրուկն էր, որ քրիստոնէութիւնը հալածող նշանաւոր անձնաւորութիւն մըն էր: Պալատի նորադարձ քրիստոնէաներուն մէջ կը գտնուէր նաեւ Սանատրուկի աղջիկը՝ Սանդուխտ կոյս: Սանատրուկ երբ լսեց թէ պալատականներէն շատերը քրիստոնէայ դարձած են, զայրացաւ եւ անմիջապէս սպաննել տուաւ զանոնք, իսկ Սադուխտ կոյսը բանտարկել տուաւ:

Թադէոս Առաքեալ, որ հրաշքով ազատած էր, բանտ գնաց եւ քաջալերեց Սանդուխտը իր հաւատքին մէջ անդրդուելու մնալուն համար: Թագաւորը ի զուր փորձեց համոզելու Սանդուխտը, որ հրաժարի իր նոր հաւատքէն եւ վերադարձայ կռապաշտութեան: Սադուխտ հաստատ մնաց իր հաւատքին մէջ: Այն ատեն Սանատրուկ սպաննել տուաւ թէ՛ Սանդուխտ կոյսը եւ թէ՛ Թադէոս Առաքեալը:

Թադէոս Առաքեալի գերեզմանը կը գտնուի Արտազ գաւառին մէջ, ուր կառուցուած է Թադէի վանքը: Հայաստանեայց Առաքելական Սուրբ Եկեղեցին Դեկտեմբերի 3-ին կը նշէ մեր ժողովուրդի առաջին լուսաւորիչներու եւ մեր Եկեղեցւոյ հիմնադիրներու Ս. Թադէոս եւ Ս. Բարթողիմէոս առաքեալներու տօնը:

Յովհաննէս Սրկ. Սերոբեան

ԼՈՒՐԵՐ ԳԱՂՈՒԹՆԵՐԷՆ

Քրիստոսի Պոհճալեան Զեկուցեց Արցախի Մասին



Կազմակերպութեամբ Միացեալ Նահանգներու Արեւելեան շրջանի Հայ մշակութային «Արցախ ֆոնտ»-ին եւ «Թիւֆէնքեան» հիմնարկին, 29 հոկտեմբերին Մանհաթընի «Թիւֆէնքեան» հաստատութեան ցուցասրահին մէջ տեղի ունեցաւ ձեռնարկ:

Կազմակերպիչ յանձնախումբի պատասխանատու՝ Անդրանիկ Գասպարեան, բարի գալուստի իր խօսքին մէջ տեղեկութիւններ փոխանցեց վերջին ամիսներուն Արցախի մէջ տեղի ունեցող իրադարձութիւններուն եւ յատկապէս քառօրեայ պատերազմին մասին: Ան շեշտեց, որ Ազրպէյճանի ապատեղեկատուական մեքենան շարունակ կ'աղաւաղէ, սխալ ու անճշգրիտ տեղեկութիւններ կը փոխանցէ, եւ շարունակ կը յայտարարէ, թէ պատմութիւն ունեցող արցախեան այդ հայաշունչ հողերը կը պատկանին ազերիներուն:

Ապա Գասպարեան բեմ հրաւիրեց Քրիստոսի Պոհճալեանը, որ ամենայն հարազատութեամբ եւ վերջերս տուած իր այցելութեան լոյսին տակ ներկայացուց իրավիճակը Արցախի մէջ:

Պոհճալեան արդէն իսկ այդ ճամբորդութենէն տպաւորութիւններ լոյս ընծայած է «Ամերիկան Այսօր», «Տը պրիւնկթըն ֆրի փրես» եւ այլ թերթերու մէջ: Անոր վերջին գրութիւնը պատմութիւնն է Սուրիոյ պատերազմէն խոյս տուած հայորդիի մը, որ հաստատուած է Արցախ, խանդավառելով տեղացիները:

Աւելի քան կէս ժամ տեւողութեամբ Պոհճալեան ներկայացուց իր հնգօրեայ ուղեւորութենէն յուշեր ու տպաւորութիւններ: Ան տեսակցած ու մտերմիկ զրոյցներ ունեցած է զինուորներու, աշակերտներու, ուսուցիչներու եւ նոյնիսկ պարզ բնակիչներու հետ, որոնք իր վրայ ձգած են խոր տպաւորութիւն:

Աւարտին ներկաները առիթ ունեցան հարցումներ ուղղելու Պոհճալեանին:

Այս առիթի կատարուեցան նուիրատուութիւններ «Արցախ ֆոնտ»-ին եւ «Թիւֆէնքեան» հիմնարկին կողմէ կառուցուող Առաջամուղ գիւղին:

Աւագութեան Տիտղոս Կոմիտաս Քինյ. Թորոսեանին

16 հոկտեմբերին Կլենտլիյի Ս. Աստուածածին եկեղեցւոյ մէջ Ս. պատարագին ընթացքին, թեմի առաջնորդ Սուշեղ արք. Մարտիրոսեան Աւագութեան տիտղոս շնորհեց եկեղեցւոյ հովիւ Կոմիտաս Քինյ. Թորոսեանին:



Ընդառաջելով առաջնորդ սրբազան հօր դիմումին՝ Արամ Ա. վեհափառ հայրապետը, գնահատելով Կոմիտաս Քինյ. Թորոսեանի բազմամեայ ծառայութիւնը՝ Աւագ

քահանայության տիտղոս շնորհեց անոր:

Սրբազանը կարդաց վեհափառ հայրապետին սրբատառ կոնդակը, որմէ ետք ան իր քարոզին մէջ գնահատեց քահանայ հօր անցնող քսանեօթը տարիներու նուիրեալ ծառայութիւնը, որուն տասնհինգը՝ Արեւմտեան թեմէն ներս, ապա շնորհաւորեց զայն: Առաջնորդը նկատել տուաւ, որ հոգեւորականներուն ընծայուած պատիւները լոկ մեծարանքի տիտղոսներ չեն, այլ՝ հաւատարմութեան, խոնարհութեան, համեստութեան խթաններ եւ ուխտի նորոգման առիթ:

Իր կարգին, երախտագիտական խօսքով ելոյթ ունեցաւ Կոմիտաս Ա. քինյ. Թորոսեան:

Պատարագէն ետք, եկեղեցոյ կից «Արմենակ Տէր Պետրոսեան» սրահին մէջ տեղի ունեցաւ Սրբոց Թարգմանչաց տօնակատարութիւն:

Անդրանիկ Խեչումեանին Նուիրուած Գնահատանքի Ձեռնարկ



Նախաձեռնութեամբ «Օֆոդ» հրատարակչութեան, 31 հոկտեմբերին տեղի ունեցաւ մեծարանքի երեկոյ՝ նուիրուած իրանահայ թարգմանիչ, բեմադրիչ եւ մշակութային գործիչ Անդրանիկ Խեչումեանին: Այս առիթով սփիւռքի մէջ հայ գրականութեան, մշակոյթի պահպանման, զարգացման եւ ծանօթացման գործին մէջ ունեցած ասանդին համար Խեչումեան պարգեւատրուեցաւ Հայաստանի Գրողներու միութեան «Կանթեղ»

շքանշանով:

Ձեռնարկին ընթացքին ելոյթ ունեցան «Օֆոդ» հրատարակչութեան տնօրէն Ռեզա Հաշեմինեժադ, խմբավար Լորիս Ճգնաւորեան, թարգմանիչ Ասատուլլահ Ամրայի, Իսլամական ազատ համալսարանի Հայերէնագիտական ամպլոնի վարիչ դոկտ. Անդրանիկ Սիմոնեան, գրաքննադատ Մասուտ Ալի Մահմուտի եւ թատերագիր Աբբաս Ջահանգիրեան:

Իր կարգին Անդրանիկ Խեչումեան շնորհակալութիւն յայտնեց «Օֆոդ» հրատարակչատան իր գործերը հրատարակելուն համար:

Աւարտին հրատարակչական ընկերութիւններուն կողմէ յուշանուէրներ յանձնուեցան մեծարեալին:

Արմին Վեկների Նուիրուած ԺապաւենիՑուցադրութիւն

Համագործակցութեամբ Քանատայի Մարդկային իրաւանց թանգարանին եւ կազմակերպութեամբ Քանատայի եւ Քեպլեքի Հայ դատի յանձնախումբերուն, 29 հոկտեմբերին Մոնրէալի մէջ տեղի ունեցաւ թանգարանի կողմէ պատրաստուած «Խիղճի արարքներ. Արմին Թ. Վեկներ եւ Հայոց ցեղասպանութիւնը» խորագրեալ վաւերագրական ժապաւենի անդրանիկ ցուցադրութիւնը: Քանատայի Հայ դատի յանձնախումբի տարած աշխատանքին եւ Քանատայի Մարդկային իրաւանց թանգարանին հետ անոր համագործակցութեան անդրադարձաւ Արեւիկ Աֆարեան: Քանատայի ժառանգութեան նախարար Մելանի Ժոլի շեշտը դրաւ Քանատայի

կառավարության անհանդուրժող կեցուածքին վրայ՝ մարդկային իրաւանց որեւէ խախտումի վերաբերեալ:

Թանգարանի տնօրէն Ճան Եանկ եւ թանգարանի հանրային յարաբերութեան պատասխանատու Անժելա Քասի ներկայացուցին թանգարանի բազմակողմանի գործունէութիւնը եւ յատկապէս Հայոց ցեղասպանութեան առնչութեամբ թանգարանին տարած աշխատանքները, որոնցմէ մէկն էր Ցեղասպանութիւնը վաւերագրած Արմին Վեկների կեանքին ու գործունէութեան նուիրուած սոյն ժապաւէնը:



ԱԱպա խօսք առաւ ժապաւէնի մեկնաբաններէն, հայ հռչակաւոր դերասան Արսինէ Խանճեան, որ շեշտեց կարեւորութիւնը նման գործերու պատրաստութեան եւ տարածման եւ կոչ ուղղեց յատկապէս երիտասարդութեան, որ իր գործունէութեամբ ու նուիրումով տէր կանգնի հայ ժողովուրդի հաւաքական ինքնութեան ու իրաւունքներուն:

Ապա քննարկուեցաւ ժապաւէնը, ինչպէս նաեւ Վեկների կեանքն ու գործը, որ համադրուեցաւ փրոֆ. Լալէ Մանճիկեանի կողմէ:

Աւարտին շնորհակալական խօսքով ելոյթ ունեցաւ Քանատայի Հայ դատի յանձնախումբի անդամ Լորի Ապրաքեան:

Գերմանացի Բժիշկներու Եւ Ուսանողներու Այցելութիւնը Առաջնորդարան

27 հոկտեմբերին, Ատրպատականի հայոց թեմի առաջնորդարան այցելեցին խումբ մը գերմանացի բժիշկներ եւ ուսուցիչներ, որոնք «Էմիլ Յակոբեան» սրահին մէջ հանդիպում ունեցան Ատրպատականի Հայոց թեմի առաջնորդ Գրիգոր եպս. Չիֆթճեանի հետ:

Անոնց նպատակն էր ծանօթանալ Ատրպատականի մէջ յատկապէս հայկական սրբավայրերուն:



Առաջնորդ սրբազանը, ողջունելով անոնց ծրագիրը, լայն ծանօթութիւններ փոխանցեց Իրանի մէջ հայերու ներկայութեան եւ դարերու ընթացքին երկրի բարգաւաճման բերած նպաստին մասին՝ թեմին մէջ բազմաթիւ եկեղեցիներու գոյութիւնը, նկատելով տարածաշրջանին մէջ քրիստոնէական վկայութեան գովելի օրինակ մը: Հանդիպման ընթացքին անդրադարձ կատարուեցաւ թեմի եկեղեցական-համայնքային կեանքին, նաեւ անոնց այցելելիք սրբավայրերուն մասին պատմական ծանօթութիւններ տրուեցաւ:

www.aztagdaily.com

ԱՅԼԱԶԱՆ

Երեխայի Դաստիարակության 19 Պատուիրան Մարիա Մոնթեսորիէն

Իտալացի անուանի մանկավարժ, փիլիսոփայ Մոնթեսորիէն այն չորս մանկավարժներէն մէկն է, որ ըստ ԵՈՒՆԵՍԿՕ-ին, մեծ ներդրում ունեցած է 20-րդ դարու մանկավարժական մտածողութեան ձեւերու հաստատման մէջ: Մոնթեսորիէն ստեղծած է մեթոտ մը, որուն հիմնական սկզբունքն է՝ օգնել ինծի ինքնաբաւ գործել:

Ստորեւ կը ներկայացնենք Մոնթեսորիէն կողմէ մշակուած 19 պատուիրան՝ ծնողներուն համար:

- 1.- Երեխային կ'ուսուցանել զայն շրջապատող միջավայրը:
- 2.- Եթէ երեխան յաճախ քննադատեն, ան կը սորվի դատապարտել:
- 3.- Եթէ երեխան յաճախ գովեն, ան կը սորվի գնահատել:
- 4.- Եթէ երեխային հետ վարուին թշնամաբար, ան կը սորվի անդադար կռուիլ:
- 5.- Եթէ երեխային հետ ազնիւ վարուին, ան կը սորվի արդար ըլլալ:
- 6.- Եթէ երեխան յաճախ ծաղրեն, ան կը դառնայ վախկոտ:
- 7.- Եթէ երեխան ապրի ապահովութեան զգացումով,- ան կը սորվի հաւատալ:
- 8.- Եթէ երեխան յաճախ անարգեն, ան կը սկսի մեղաւոր զգալ:
- 9.- Եթէ երեխան յաճախ խրախուսեն, ան կը սորվի ինքզինքին հանդէպ լաւ վերաբերիլ:
- 10.- Եթէ երեխային հանդէպ յաճախ հանդուրժողութիւն ցուցաբերեն, ան կը վարժուի համբերատար դառնալ:
- 11.- Եթէ երեխան յաճախ ուրախացնեն, ան ինքնավստահ կը դառնայ:
- 12.- Եթէ երեխան համերաշխ միջավայրի մէջ կ'ապրի, ան ինքզինք պիտանի կը զգայ եւ կը սորվի սէր գտնել այս աշխարհին մէջ:
- 13.- Երեխային մասին վատ մի' խօսիք՝ ո'չ անոր ներկայութեան, ո'չ բացակայութեան:
- 14.- Կեղրոնացէք երեխային մէջ լաւի զարգացման վրայ այնքան, որ վատին համար տեղ չմնայ:
- 15.- Միշտ լսեցէ՛ք եւ պատասխանեցէ՛ք ձեզի դիմող երեխային:
- 16.- Յարգեցէք երեխան, որ սխալ գործած է, բայց կրնայ հիմա կամ քիչ ետք ուղղել սխալը:
- 17.- Պատրաստ եղէք օգնելու այն երեխային, որ կը փնտռէ, եւ աննկատ մնացէք այն երեխային համար, որ արդէն գտեր է:
- 18.- Օգնեցէք երեխային՝ իւրացնելու չիւրացուցածը: Ատիկա ըրէք շրջապատը լեցնելով հոգածութեամբ, զսպուածութեամբ, խաղաղութեամբ եւ սիրով:
- 19.- Երեխային հետ յարաբերելու ժամանակ տեւաբար դրսեւորեցէք լաւ վարքագիծ, անոր փոխանցեցէք ձեր մէջ եղած դրականը:





ՅԱՅՏԱՐԱՐՈՒԹԻՒՆ

Միբելի Քուէթահայեր,

Մոյն յայտարարութեամբ, ուրախ ենք տեղեկացնելու ձեզ թէ՛ Համազգային Հայ Կրթական և Մշակութային Միութեան Քուէթի Մեկուսի Մասնաճիւղի Հիմնադիր Ժողովը տեղի պիտի ունենայ Ուրբաթ, 11 Նոյեմբեր 2016-ին, երեկոյեան ժամը 8-ին, Սրբոց Վարդանանց Եկեղեցոյ Արարատ սրահին մէջ, ներկայութեամբ Համազգայինի Կեդրոնական Վարչութեան ներկայացուցիչին: Համազգային Հայ Կրթական և Մշակութային Միութիւնը հիմնուած է Գահիրէի մէջ 1928-ին, Հայաստանի Առաջին Հանրապետութեան պետական և կուսակցական երախտաւորներ՝ Համօ Օհանջանեանի, Լևոն Շանթի, Նիկոլ Աղբալեանի, Գասպար Իփէկեանի և այլոց ջանքերով: Համազգայինը զուտ կրթական և մշակութային հարցերով զբաղող միութիւն մըն է որ իր քոյր միութեանց՝ ՀՕՄԻ և ՀՄԸՄԻ կողքին կը գործէ Սփիւռքի ամբողջ տարածքին, հո՛ւն ուր կայ մշակութասէր Հայ ժողովուրդը, նպատակ ունենալով՝ պահպանել, զարգացնել և տարածել Հայ մշակոյթը որպէս Հայ Դատի և Հայապահպանման կարևոր ազդակ:

Համազգայինի գոյութեան անհրաժեշտութիւնը առաւել ևս ցայտուն դարձած էր վերջին տարիներուն մեր փոքրաթիւ, բայց մշակութային բուռն կեանքով ապրող՝ գաղութին համար: Այս նախադրեալները նկատի ունենալով, Թեմիս Երեսփոխանական Ժողովը յանձնարարած էր Գաղութիս պատկան մարմիններուն ընթացք տալ Համազգայինի միաւորի կազմութեան, իր հովանիին տակ համախմբելու գաղութէս ներս գործող մշակութային խմբակները ու նոր ուժ, որակ և զարգացում ապահովելու անոնց:

Այսօր, հասած է ժամանակը՝ ՀՄԸՄԻ և ՀՕՄԻ կողքին ունենալու մե՛ր Համազգայինի մասնաճիւղը: Արդ, կոչ կ'ուղղենք գաղութիս մշակութասէր անհատներուն իրենց կարողութիւնը, ժամանակը և եռանդը ի սպաս դնել Հայ մշակոյթին ծառայելու, Համազգայինի ճամբով:

Անդամագրուելու համար դիմել Ուրբաթ օրերը՝ Թաղականութեան գրասենեակ կամ հեռաձայնել՝ 66709206 թիւով, Օրդ. Մարալ Համալոյեանին:

*Համազգայինի Հիմնադրութեան
Կազմակերպիչ Յանձնախումբ*